

白香山集

卷四十二

論孫璿張奉國狀

孫璿

右伏以鳳翔右輔之地。控壓隴蜀。又近國門。最爲重鎮。承前已來。多擇有功勳德望者爲之節度使。昨者孫璿忽除此官。臣緣素未諳知。不敢輕議可否。及制下之後。甚不愜人心。孫璿雖久從軍。不聞有大功效。自居禁衛。亦無可稱。至於姓名。衆未知有。縱有才略。堪任將帥。猶宜且試於小鎮。不合便授此重藩。豈唯公議之間。以爲過當。亦恐同類之內。皆生倖心。況今聖政日明。朝綱日舉。每命一官一職。人皆側耳聽之。則除授之間。深宜重慎。今孫璿已受成命。未可遽又改移。待到鳳翔。觀其可否。已後不可不審。伏恐聖聰要知。

張奉國

右奉國當徐州用兵之時。已有殊効。及李錡作亂之日。又立大功。忠節赤誠。海內推服。近來將校少有比倫。已蒙聖恩。授金吾大將軍。以示獎勵。以臣所見。便宜與一方鎮。以感動天下忠臣之志。以摧懾天下姦臣之心。何者。奉國之事。無人不知。方鎮之榮。無人不愛。若奉國更得節度使。天下聞知。人皆爲貪寵榮。誰不爭効忠順。萬一若一方有事。一帥負恩。則麾下偏裨。競爲奉國。亂臣賊子。不敢不息。一則明勸忠貞。二

則聞銷禍亂。聖人機柄。正在於斯。今奉國聞已有年。亦宜速用。事不可失。臣深惜之。然以奉國未曾爲理人官。恐未可便授大鎮。若近邊次節度有要替處。與奉國最爲得宜。謹具奏聞。謹奏。

奏所聞狀

向外所聞事宜

右伏見六七日來。向外傳說皆云。有進旨令宣與諸道進奏院。自今已後。應有進奉。並不用申報御史臺。如有人勘問。便仰錄名奏來者。內外相傳。不無驚怪。臣伏料此事。多是虛傳。且有此聞。不敢不奏。伏惟德音除四節外。非時進奉。一切並停。如有違越。仰御史臺察訪聞奏。今若不許報臺。不許勘問。卽是許進奉而廢德音也。伏以陛下憂人思理。發自深誠。德音中停罷進奉。最是大節。昨者裴均所進銀器。發在德音之前。猶虛四方不知。將謂容其違越。特令送出外庫。宣報所司。遠近傳呼。聞於道路。此則不獨人心欣躍。感動四方。實亦國史光明。垂示百代。今未踰數月。忽有此消息。賀德音之使。未絕於道途。許進奉之聲。已聞於內外。此衆情所以驚愕而不測也。臣昨訪聞。又無明勅。伏料聖意必無此處分。但恐宣傳之際。或致疑誤。遂令內外有此流傳。實恐旬月之間。散報諸道。虧損聖政。無甚於斯。若此果虛。卽望宣示內外。令知聖旨。使息虛聲。伏願宸衷速有處分。謹具奏聞。謹奏。

奏閩鄉縣禁囚狀

饒州閩鄉湖城等縣禁囚事宜

右伏聞前件縣獄中有囚十數人。並積年禁繫。其妻兒皆乞於道路。以供獄糧。其中有禁身多年。妻已改

嫁者身死獄中。取其男收禁者。云是度支轉運下囚。禁在縣獄。欠負官物。無可填賠。一禁其身。雖死不放。前後兩遇恩赦。今春又降德音。皆云節文不該。至今依舊囚禁。臣伏以罪坐之刑。無重於死。故殺人者罪止於死。坐賊者身死不徵。今前件囚等欠負官錢。誠合填納。然以貧窮孤獨。唯各一身。債無納期。禁無休日。至使夫見在而妻嫁。父已亡而子囚。自古罪人未聞此苦。行路見者。皆爲痛傷。況今陛下愛人之心。過於父母。豈容在下有此窮人。古者一婦懷冤。三年大旱。一夫結憤。五月降霜。以類言之。臣恐此囚等憂怨之氣。必能傷陛下陰陽之和也。其囚等人數及所欠官物。并赦文不該事由。臣卽未知委細。伏望與宰相商量。兼令本司具事由分析聞奏。如或是實。禁繫不虛。伏乞特降聖慈。發使一時放免。一則使縲囚獲宥。生死皆知感恩。二則明天聽及卑遠。近自無冤滯事。關聖政不敢不言。臣兼恐度支鹽鐵使下諸州縣禁囚更有如此者。伏望便令續條疏具事奏上。

論承瓘職名狀

承瓘充諸軍行營招討處置使

右緣承瓘職名。自昨日來。臣與李絳等已頻論奏。又奉宣令依前定者。臣實深知不可。豈敢順旨便休。伏望聖慈更賜詳察。臣伏以國家故事。每有征伐。專委將帥。以責成功。近年已來。漸失舊制。始加中使命爲都監。頃者韓全義討淮西之時。以賈良國爲都監。近日高崇文討劉闢之時。以劉貞亮爲都監。此皆權宜。且爲近例。然則與王者之師。徵天下之兵。自古及今。未有令中使專統領者。今神策軍既不置行營節度使。卽承瓘便是制將。又充討軍招討處置使。卽承瓘便是都統。豈有制將都統而使中使兼之。臣恐四方

聞之。必輕朝廷。四夷聞之。必笑中國。王承宗聞之。必增其氣。國史記之。後嗣何觀。陛下忍令後代相傳云。以中官爲制將都統。自陛下始。伏乞聖慮。以此思之。臣又兼恐劉濟茂昭及希朝從史乃至諸道將校。皆恥受承璀指麾。心既不齊。功何由立。此是資承宗之計。而挫諸將之勢也。伏乞聖慮。又以此思之。臣伏以陛下自春宮以來。則曾驅使承璀。歲月既久。恩澤遂深。望陛下念其勤勞。貴之可也。陛下憐其忠赤。富之可也。至於軍國權柄。動關於治亂。朝廷制度。出自於祖宗。陛下寧忍徇下之情。而自墜法制。從人之欲。而自損聖明。何不思於一時之間。而取笑於萬代之後。今臣忘身命。瀝肝膽。爲陛下痛言者。非不知逆耳。非不知危身。但以螻蟻之命至輕。社稷之計至重。伏乞聖慮。又以此思之。陛下必不得已。事須用之。卽望改爲都監。且循舊例。雖威權尙重。而制度稍存。天下聞之。不甚驚聽。如蒙允許。伏望速宣與中書。改爲諸軍都監。臣不勝憂迫懇切。彷徨之至。

論元稹第三狀

監察御史元稹。貶江陵府士曹參軍。

右伏緣元稹左降事。宜李絳崔羣等。再已奏聞。至今未蒙宣報。伏恐愚誠未懇。聖慮未迴。臣更細思。事有不可。所以塵黷。至於再三。臣內察事情。外聽衆議。元稹左降不可者三。何者。元稹守官正直。人所共知。自授御史已來。舉奏不避權勢。只如奏李公佐等之事。多是朝廷親情人。誰無私。因以挾恨。或假公議。將報私嫌。遂使誣謗之聲。上聞天聽。臣恐元稹左降已後。凡在位者。每欲舉事。必先以元稹爲戒。無人肯爲陛下當官執法。無人肯爲陛下嫉惡繩愆。內外權貴親黨縱橫。有大過大罪者。必相容隱而已。陛下從此無

由得知此其不可者一也。昨者元稹所追勸房式之事。心雖奉公。事稍過當。既從重罰。足以懲違。況經謝恩。旋又左降。雖引前事以爲責詞。然外議諠諠。皆以爲元稹與中使劉士元爭廳。自此得罪。至於爭廳事。理已具前狀奏陳。況聞劉士元踏破驛門。奪將鞍馬。仍索弓箭。嚇辱朝官。承前已來。未有此事。今中官有罪。未見處置。御史無過。卻先貶官。遠近聞知。實損聖德。臣恐從今已後。中官出使。縱暴益甚。朝官受辱。必不敢言。縱有被凌辱毆打者。亦以元稹爲戒。但吞聲而已。陛下從此無由得聞。此其不可者二也。臣又訪聞元稹自去年已來。舉奏嚴礪。在東川日。枉法收沒平人資產八十餘家。又奏王紹遠法給券。令監軍神樞及家口入驛。又奏裴玢違勅旨徵百姓草。又奏韓臯使軍將封杖打殺縣令。如此之事。前後甚多。屬朝廷法行。悉有懲罰。計天下方鎮皆怒元稹守官。今貶爲江陵判司。卽是送與方鎮。從此方便報怨。朝廷何由得知。臣聞德宗時。有崔善貞密告李錡必反。德宗不信。送與李錡。李錡大怒。遂掘坑縱火。燒殺崔善貞。未數年。李錡果反。至今天下爲之痛心。臣恐元稹左降後。方鎮有過。無人敢言。皆欲惜身。永以元稹爲戒。如此。則天下有不軌不法之事。陛下無由得知。此其不可者三也。若無此三不可。假如朝廷誤左降一御史。蓋是小事。臣何敢煩黷聖聽。至於再三乎。誠以所損者微。所關者大。以此思慮。敢不極言。陛下若以臣此言爲忠。又未能別有處置。必不得已。則伏望且令追制。改與一京師閑官。免令元稹卻事方鎮。此乃上裨聖政。下愜人情。伏望細察事情。斷在聖意。謹具奏聞。謹奏。

請罷兵第二狀

請罷恆州兵事宜

右緣討伐恆州事宜前者已具奏聞。此事至大至切。臣不合一奏便休。伏願聖聰再賜詳省。臣伏以河北事體本不合用兵。既已用兵。亦希萬一。所以人意或望成功。今看事勢。保必無望。何者。陛下本用兵之初。第一倚望承瓘。第二准擬希朝。茂昭今承瓘自去已來。未敢苦戰。已喪大將。先挫軍威。至今與從史兩軍入賊界。下營未得。從史雖經接戰。與賊勝負略均。況奏報之間。又事恐非實。遷延進退。貴引日時。不唯意在逗留。兼是力難支敵。希朝茂昭數月已來。方入賊界。據所奏。到賊新市城一鎮。便過不得。又奏深澤縣今卻被賊打破。則其進討之勢。想亦可知。劉濟親領全軍。分圍樂壽。又奏賊城堅守。卒不易攻。師道季安元不可保。今看情狀。似相計會。各收一縣。便不進軍。如此事由陛下具見。據其去就。豈有成功。未審聖心何如。更有所望。以臣愚見。速須罷兵。若又遲疑。其害有四。可爲陛下痛惜者二。可爲陛下深憂者二。何則。若保有成功。卽不論用度多少。旣的知不可。卽不合虛費貲糧。悟而後行。事亦非晚。今遲校一日。有一日之費。更延旬月。所費滋多。終須罷兵。何如早罷。臣伏見陛下比來愛人省用。發自深心。至於聖躬。每事節儉。今以府庫錢帛。百姓脂膏。資助河北諸侯。轉令富貴強大。臣每念此。不勝憤歎。此其爲陛下痛惜者一也。臣伏恐河北諸將見吳少陽已受制命。必引事例。輕重同詞。請雪承宗。若章表繼來。卽議無不許。請而後捨。模樣可知。轉令承宗膠固。同類如此。則與奪皆由鄰道。恩信不出朝廷。實恐權威盡歸河北。臣每念此。實所疚心。其爲陛下痛惜者二也。今天時已熱。兵氣相蒸。至於飢渴疲勞。疫疾暴露。衣甲暑溼。弓箭瘡痍。上有赤日。前有白刃。驅以就戰。人何以堪。縱不惜身。亦難忍苦。況神策官健。又最烏雜。以城市之人。例皆不慣。如此忽思生路。或有奔逃。一人若逃。百人相扇。一軍若散。諸軍必搖。事忽至此。悔將何及。此其爲

陛下深憂者一也。臣伏聞迴鶻吐蕃皆有細作。中國之事。小大盡知。今聚天下之兵。唯討承宗一賊。自冬及夏。都未立功。則兵力之強弱。資費之多少。豈宜使西戎北虜一一知之。忽見利生心。承慮人寇。以今之勢力。可能救其首尾哉。兵連禍生。何事不有。萬一及此。實關安危。臣每思之。憂入骨髓。此其爲陛下深憂者二也。伏惟詳臣此狀。察臣此心。審賜裁量。速有處分。如此。則是陛下社稷宗廟之福。不獨天下幸甚。謹具奏聞。

請罷兵第三狀

請罷恆州兵馬事宜

右臣所請罷兵前後已頻陳奏。今日事勢又更不同。比來日月漸深。憂惶轉甚。若不極慮。若不切言。是臣懼罪惜身上。負陛下。伏希聖鑒。憐察血誠。知臣心如此。更詳此狀。臣伏以行營近日事體。陛下一一具知。師道今收棣州。至今竟未奉詔。至於表章詞意。近者亦甚乖宜。季安等心元不可測。與賊計會。各收一空縣而已。相顧拱手便休。聞昨者澤潞潰散健兒。其間有人魏博。卻投邢州者。季安追捉。並按軍令。昨所與詔。都不稟承。據此情狀。略無形迹。但恐今日已後。此輩無不辨爲。又比來所望有功。只在南北兩道。今師道希朝等。屯軍向欲半年。過新市一鎮未得。茂昭又稱兵少。特地方請加兵。則南道勢力。今亦可見。北道承璀竟未立功。元陽新到邢州。又奏兵數至少。請諸軍兵馬議不可抽。假使承璀等竭力盡忠。終恐不副聖意。據此事勢。萬無成功。陛下猶未罷兵。不知更有何所待。臣伏恐劉濟近日情似盡忠。今忽罷兵。慮傷其意。以臣所見。理固不然。劉濟大姦。過於羣輩。外雖似順。中不可知。有功無功。進退獲利。初聞罷討。或可

有詞見雪恆州必私懷喜何則於承宗本末之勢同也假令劉濟實忠實義陛下難阻其心猶須計量重輕捨小圖大豈緣劉濟一人惆悵而不顧天下遠圖況今事情又不至此伏望聖意斷之不疑臣昨者以軍久無功時又漸熱人不堪命慮有奔逃前狀之中已具陳奏今果聞神策所管徐泗鄭滑兩道兵馬各有言語似少不安臣自聞之不勝憂切一軍若不寧帖必扇諸軍之心自此動搖何慮不有事忽至於此者則陛下求不罷討得乎一種罷兵何如早罷必待事不得已然後罷之只使陛下威權轉銷天下模樣更惡如此事勢皆在目前只合逆防不合追悔今盧從史已歸罪左降王承宗又乞雪表來元陽方再整本軍劉濟且引兵欲進因此事勢正可罷兵赦既有名罷猶有勢若又此時不能臣實不測聖心臣伏料陛下去年初銳意用兵之時必謂討承宗如討劉闢李錡兵合之後坐見誅擒豈料遷延經年如此然則始謀必剋猶不可知後事轉難更何所望至於竭府庫以富河北諸將盧中國以使戎狄生心可爲深憂可爲痛惜已具前奏不敢再陳況今日已前所惜者威權財用今日已後所憂者治亂安危國家有天下二百年陛下承宗社十一葉豈得以小忿而忘國家大計豈得以小恥而忘宗社遠圖伏願聖心以此爲慮臣前後已獻三狀不啻千言詞既繁多語亦懇切陛下若以臣所見非是所言非忠況以塵黷不休臣卽合便得罪若以臣所見爲是所言爲忠則陛下何忍知是不從知忠不納不然則臣合得罪不然則陛下罷兵伏望讀臣此狀一二十遍斷其可否速賜處分臣不勝負憂待罪懇迫兢惶之至謹奏

論嚴綬狀

奉宜令依中書狀撰制除嚴綬江陵節度使

右臣伏以趙宗儒衆稱清介有恆嚴綬衆稱佳儒無恥二人臧否優劣相懸宗儒自到江陵雖無殊政亦聞清淨境內頗安縱要改移卽合便擇勝宗儒者且嚴綬在太原之事聖聰備聞天下之人以爲談柄陛下罷其節制追赴朝廷至今人情以爲至當今忽再用又替宗儒臣恐制書下後無不驚歎兼邪人得計正人憂疑大乖羣情深損朝政臣前後所奉宣撰制若非甚不可者亦不敢切論今此除授實甚不可伏望聖意更賜裁量其制未敢便撰伏待聖旨謹奏

論孟元陽狀

奉宣令依中書狀撰制除孟元陽右羽林軍統軍仍封趙國公食邑三千戶

右臣伏以孟元陽澌水有功河陽有政自到澤潞戎事頗修但以老年事須與替比諸流輩事迹不同今所除官合加優獎昨者范希朝在太原日昏耄不理人情共知及除統軍衆猶謂屈今元陽事迹不同希朝又除統軍恐似更屈雖加封爵悉是虛名況元陽功効忠勤天下有數今以無能者一例除改無所旌別臣恐今日已後無以勸人以臣所見若改除金吾大將軍輕重之間實爲得所只如柳惟晨李簡之輩有何功業合比元陽猶居此官動逾年歲伏望聖慈以此裁量其制未敢依中書狀便撰謹具奏聞伏待聖旨謹奏

謝官狀

新授將仕郎守左拾遺翰林學士臣白居易

新授朝議郎守尚書庫部員外郎翰林學士雲騎尉臣崔羣

右臣等伏奉恩制。除前件官。今日守謙奉宣進旨。特加慰諭。并賜告身者。聖慈曲被。寵命猥加。俯以拜恩。跪而受賜。蹈舞離次。驚惶失圖。伏以郎吏諫官。古今所重。位當星象。職在箴規。皆須聞望清方。行實端慤。然後可以佐彌綸於草昧。能正其詞。盡獻納於芻言。必直其節。苟輕所選。實忝厥官。臣等學識庸虛。才質愚懦。自居近職。忝冒已深。況超擢榮班。慚惶交至。初授殊常之寵。聞實若驚。再思難報之恩。感而欲泣。唯當奮勵。鯨鈍。補拾闕遺。中誓赤誠。上酬玄造。俯伏憂愧。若無所容。無任感恩兢惕之至。謹奉狀陳謝以聞。謹奏。

奏陳情狀

翰林學士將仕郎守左拾遺臣白居易

右今日守謙奉宣聖旨。以臣本官合滿。欲議改轉。知臣欲有陳露。令臣將狀來者。臣有情事。不敢不言。伏希聖慈。俯察愚懇。臣母多病。臣家素貧。甘旨或虧。無以爲養。藥餌或闕。空致其憂。情迫於中。言形於口。伏以自拾遺授京兆府判司。往年院中曾有此例。資序相類。俸祿稍多。儻授此官。臣實幸甚。則及親之祿。稍得優豐。荷恩之心。不勝感激。輒敢塵黷。無任兢惶。謹具奏陳。伏待聖旨。

謝官狀

新授京兆府戶曹參軍翰林學士白居易

右伏奉恩制。除臣前件官。今日守謙奉宣聖旨。特加慰諭。兼賜告身者。俯偏拜恩。忱惕受命。戰越跼蹐。驚惶失容。蹈舞屏營。不知所據。臣叨居近職。已涉四年。自顧庸昧。無裨明聖。塵忝歲久。憂慚日深。況於官祿。

之間。豈敢有所選擇。但以位卑俸薄。家貧親老。養闕甘馨之費。病乏藥石之資。人子之心。有所不足。昨蒙聖念。雖許陳情。敢望天恩。遽從所欲。況前件官位望雖小。俸料稍優。臣今得之。勝登貴位。此皆皇明俯察。玄造曲成。念臣爲子之誠。賜臣及親之祿。臣所以撫心知愧。因事吐誠。烏鳥私情。得盡歡於展養。犬馬微力。誓効死以酬恩。榮幸不止於一身。感戴實深於萬品。無任荷恩抃躍之至。

謝蒙恩賜設狀

右今日守謙奉宣聖旨。以臣初入院。特賜設者。臣生長窮賤。才質孱微。草野鄙夫。風塵走吏。豈期聖造。選在禁闈。煦以天慈。賜以御食。臣所以凌兢受命。俯伏荷恩。心魂不寧。手足無措。況樽開九醞。饌列八珍。惠過加籩。榮優置醴。金壘引滿。將王澤而共深。玉饌屬厭。與聖德而俱飽。終食且歎。捫心自驚。戰汗慚惶。隕越於下。謹奉狀陳謝以聞。謹奏。

謝恩賜衣服狀

右今日守謙奉宣聖旨。以臣初入院。特賜衣服者。臣自入禁司。纔經旬月。未陳薄効。累受殊私。況前件衣服等獻。自遠方降。從御府既鮮華而駭目。亦輕煖而便身。臣實何人。堪此榮賜。臣必擬祕藏篋笥。傳示子孫。何則。顧陋質而懷慚。貌非稱服。撫微軀而荷寵。力不勝衣。因物感恩。無任愧懼。謹奉狀。

三月三日謝恩賜曲江宴會狀

右今日伏奉聖恩。賜臣等於曲江宴樂。并賜茶果者。伏以暮春良月。上巳嘉辰。獲侍宴於內廷。又賜歡於曲水。蹈舞踟地。歡呼動天。況妓樂選於內坊。茶果出於中庫。榮降天上。寵驚人間。臣等謬列近司。猥承殊

澤捧觴知感終宴懷慚肉食無謀未展涓埃之效素飡有愧難勝醉飽之恩以此兢惶未知所報謹奉狀陳謝以聞謹奏

九月九日謝恩賜宴曲江會狀

右臣今日伏奉進旨賜臣等於曲江宴會特加宣慰并賜酒脯等者伏以重陽令節大有豐年賜宴於無事之朝追歡於最勝之地況天廚酒脯御府管絃寵賜忽降於寰中慶幸實生於望外仍加慰諭曲被輝華臣等各以凡才同參密職幸遇休明之日多承飫賜之恩樂感形骸歡容動而成舞澤均草木秋色變以爲春徒激丹心豈報玄澤謹奉狀

臘日謝恩賜口蠟狀

右今日蒙恩賜臣等前件口蠟及紅雪澡豆等仍以時寒特加慰問者伏以時逢臘節候屬祁寒豈意聖慈不忘微賤念嚴凝而加之煦嫗慮駁瘕而潤以脂膏喜氣動中歡容發外挾續之恩甫及和則體舒不龜之澤既霑感而手舞臣等省躬懷愧因物諭情豈止飲德瑩心唯驚寵賜必擬澡身勵節以答鴻私感躍之誠倍萬恆品謹具奏聞謹奏

中和日謝恩賜尺狀

右今日奉宣賜臣等紅牙銀寸尺各一者伏以中和屆節慶賜申恩當晝夜平分之時頻度量合同之令況以紅牙爲尺白銀爲寸美而有度煥以相宜速下明付度之心爲上表裁成之德慶澤所及歡心畢同臣等塵忝日深寵錫歲至雖恩光下濟咫尺之顏不遠而尺素內慚分寸之功未効捧受愧畏倍萬恆情

謹具奏聞謹奏。

謝清明日賜新火狀

右今日高品官唐國珍就宅宣旨賜臣新火者。伏以節過藏煙。時當改火。助和氣以發滯。表皇明以燭幽。臣顧以賤微。荷茲榮耀。就賜而照臨第宅。聚觀而光動里閭。降實自天。非因榆柳之燧。仰之如日。空傾葵藿之心。徒奉恩輝。豈勝欣戴。

謝恩賜冰狀

右今日奉宣旨賜臣等冰者。伏以頒冰之儀。朝廷盛典。以其非常之物。用表特異之恩。況春羔之薦。時始因風出。當夏蟲之疑日。忽自天來。煩暑迎消。涼飈隨至。受此殊賜。臣何以堪。欣駭慚惶。若無所措。但飲之慄慄。常傾受命之心。捧之兢兢。永懷履薄之戒。以斯惕厲。用答皇慈。謹奉狀陳謝以聞。

謝賜新曆日狀

右今日蒙恩賜臣等前件新曆日者。臣等拜手蹈舞。鞠躬捧持。開卷授時。見履端之有始。披文閱處。知御曆之無窮。慶賀既深。感戴無極。謹奉狀陳謝。

謝恩賜茶果等狀

右今日高品杜文清宣進旨。以臣等在院修撰制問。賜茶果梨脯等。曲蒙聖念。特降殊私。恩諭未終。錫賚旋及。臣等慚深曠職。寵倍驚心。述清問以修詞。言非盡意。仰皇慈而受賜。力豈勝恩。徒激丹誠。詎酬玄造。謝賜設及匹帛狀。

右今日高品劉全節奉宣進旨。以臣等在院覆策畢。特加慰問。并賜設及匹帛者。臣等職在掌文。詔令考策。雖竭鄙味。猶懼闕遺。豈意皇鑒下臨。聖慈曲至。惠加賜食。榮及承筐。寵厚縑緗。仰難勝於玄貺。恩深醉飽。退有愧於素飧。徒積慚惶。何酬慶賜。

社日謝賜酒餅狀

右今日蒙恩賜臣等酒及蒸餅環餅等。伏以時唯秋社。慶屬年豐。頒上尊之酒漿。賜大官之餅餌。既非舊例。特表新恩。空荷皇慈。豈伸丹慊。謹奉狀。

卷四十三

論重考科目人狀

今年吏部應送科目及平判人所試文章等

右臣等奉中書門下牒稱奉進旨。令臣等重考定聞奏者。臣等竊有所見。不敢不奏。伏以今年吏部科第。不置考官。唯遣尙書侍郎二人考試。吏部事至繁劇。考送固難精詳。所送文書。未免瑕病。臣等若苦考覆退者必多。韓皐累朝舊臣。伏料陛下不能以小事致責臣等。又以朝廷所設科目。雖限文字。其間收採兼取人材。今吏部祇送十人。數且非廣。其中更重黜落。亦恐事體不弘。以臣所見。兼請不考。已得者不妨微俸。不得者所勝無多。貴收人材。務存大體。伏乞以臣等此狀。宣付宰臣。重賜裁量。伏聽進旨。

元和十五年十二月十三日重考定科目官將仕郎守尙書司門員外郎臣白居易等狀奏

重考定科目官將仕郎守尙書祠部員外郎上護軍臣李虞仲

舉人自代狀

中書省朝議郎權知尙書兵部郎中騎都尉楊嗣復

右臣伏准建中元年正月五日勅文武常參官上後三日舉一人自代者。伏以前件官有辯政之學。有體要之文。文可以掌王言。學可以待顧問。名實相副。輩流所推。選備侍臣。參知制命。酌其宜稱。誠合在先。臣既諳詳。輒舉自代。謹具聞薦。伏聽勅旨。

長慶元年正月四日新授朝議郎守尙書主客郎中知制誥臣白居易狀奏

論重考試進士事宜狀

右臣等伏料自欲重試進士已來。論奏者甚衆。伏計煩黷聖聽之外。必以爲或親或故。同爲黨庇。臣今非不知此。但以避嫌事小。隱情責深。所以冒犯天威。不敢不奏。伏希聖鑒。試詳臣言。伏以陛下慮今年及第進士之中。子弟得者僥倖。平人落者受屈。故令重試重考。此乃至公至平。凡是平人。孰不慶幸。況臣等才識淺劣。謬蒙選充考官。自受命已來。夙夜惶懼。實憂愚昧。不副天心。敢不盡力竭誠。苦考得失。其間瑕病。纖毫不容。猶期再三。知臣懇盡。然臣等別有愚見。上裨聖聰。反覆思量。輒敢密奏。伏准禮部試進士例。許用書策。兼得通宵。得通宵則思慮必周。用書策則文字不錯。昨重試之日。書策不容一字。給燭祇許兩條。迫促驚忙。幸皆成就。若比禮部所試事。校不同。雖詩賦之間。皆有瑕病。在與奪之際。或可矜量。儻陛下垂仁察之心。降特達之命。明示瑕病。以表無私。特全身名。以成大體。如此。則進士等知非而愧恥。其父兄等

感激而戴恩。至於有司。敢不懲革。臣等皆蒙寵擢。又忝職司。實願裨補聖明。敢不罄竭肝膽。謹具奏聞。伏待聖裁。謹奏。

長慶元年四月十日重考試進士官朝議郎守尚書主客郎中知制誥臣白居易等奏
重考試進士官朝散大夫守中書舍人上輕車都尉臣王起

讓絹狀 長慶元年八月十三日進 恩賜田布與臣人事絹五百匹

右田布以臣宣諭進旨。敬命荷恩。遂與臣前件絹。臣不敢受。尋以奏陳。昨日中使第五文岑就宅奉宣。令臣受取者。臣已當時進狀陳謝訖。感戴聖恩。昨日不敢不謝。酌量事理。今日不敢不言。臣家素貧。非不要物。但以昨者陛下遣臣宣諭田布。不同常例。田布今日之事。不同諸家。何者。未報父讎。未雪國恥。凡人有物。猶合助之。況取其財。有所不忍。又昨除田布魏博節度制中。誠云。一飯之飽。必均於士卒。一毫之費。必用於戈矛。今以五百匹絹與臣。臣若便受。則是有違制命。不副天心。臣又以凡節將之臣。發軍討叛。大費雖資於公給。小用亦籍其家財。今陛下欲使田布誓心報讎。捐軀殺賊。伏料宣諭慰問。使者道路相望。若奉使之人。悉須得物。臣恐鎮州賊徒未殄。田布財產已空。欲救將來。乞從臣始。此則求田布物者必息。而田布感聖渥倍深。責其成功。必有可望。臣食國家厚祿。居陛下清官。每月俸錢。尙慙尸素。無名之貨。豈合苟求。伏願天鑒照臨。知臣不是飾讓。臣又非不知如此小事。不合塵黷尊嚴。心實不安。不敢不奏。其前件絹。臣尋已卻還田布。伏乞聖慈。許臣不取。仍望宣示田布。令知聖恩。謹錄奏聞。伏待進旨。

論左降獨孤朗等狀 長慶元年十二月十一日奏

都官員外郎史館修撰獨孤朗可富州刺史起居舍人溫造可朗州刺史司勳員外郎李肇可澧州刺史刑部員外郎王鑑可郢州刺史

右今日宰相送詞頭左降前件官如前令臣撰詞者臣伏以李景儉因飲酒醉。既忤宰相。既從遠貶。已是深文其同飲四人又一例左降。臣有所見。不敢不陳。伏以兩省史館皆是近署。聚飲致醉。理亦非宜。然皆貶官。卽恐太重。況獨孤朗與李景儉等皆是僚友。旦夕往來。一飯一飲。蓋是常事。景儉飲散之後。忽然醉發。自猶不覺。何況他人。以此矜量。情亦可恕。臣又見貞元之末。時政嚴急。人家不敢歡宴。朝士不敢過從。衆心無繆。以爲不可。自陛下臨御。及此二年。聖慈寬和。天下欣戴。臣恐此詔或下。衆情不免驚憂。兼恐朝廷官寮從此不敢聚會。四方諸遠。不知事由。奔走流傳。事體非便。伏惟宸鑒。更賜裁量。免至貶官。各令罰俸。感恩知失。亦足戒懲。臣不揆愚陋。輒敢塵黷。豈不懼罪。豈不惜身。但緣進不因人。出於聖念。自忠州刺史累遷中書舍人。已涉二年。一無裨補。夙夜慚惕。實不自安。前後制勅之間。若非甚不可者。恐煩聖聽。多不備論。今者所見。若又不奏。是圖省事。有負皇恩。伏希天慈。以此詳察。知臣所奏不是偶然。其獨孤朗等四人出官詞頭。臣已封訖。未敢撰進。伏待聖旨。

論行營狀 應緣鎮州行營利害事宜謹具如後

一請專委李光顏東面討逐委裴度四面臨境招諭事
右臣等伏見自幽鎮有事已來。詔太原魏博澤潞易定滄州等五道節度各領全軍。又徵諸道兵馬計士七八十萬。四面圍繞。已逾半年。王師無功。賊勢猶盛。弓高已失。深州甚危者。豈不以兵數太多。反難爲用。